

# Dua buku puisi anak tempatan dilancar di Singapura

UB 27.8.2018 A3

Oleh NOORASVILLA MUHAMMA

**SANDAKAN:** Dua buku kumpulan puisi karya anak jati Sandakan, Nelson Dino, 41, dilancarkan di Singapura pada Program Ramah-Tamah Penyair Se-Nusantara ke-3 yang berlangsung pada 27 hingga 29 Julai lepas.

Program itu diadakan oleh novelis dan penyair Singapura, Rohani Din (Bunda Anie Din) dengan kerjasama penulis dan penyair di Nusantara, termasuk Perhimpunan Sastrawan Budayawan Negara Serumpun (PSBNS) yang dipelopori oleh Dr Free Hearty (Bundo Free).

Kedua-dua puisi berkenaan yang berjudul 'Pengikat Kasih' dan 'Bisikan Bumi' selain karya puisi sebelum ini, 'Kita Punya Cara' telah dilancarkan di National Service Resort and Country Club, Tanah Merah, Singapura oleh mantan Setiausaha Parlimen Kanan, Yatiman Yusof pada 27 Julai.

Puisi itu ditulis berkisarkan rasa kasih sayang kepada alam, manusia, teman-teman sealiran sastera yang banyak membantunya dan juga rasa cinta kepada tanah air serta yang Maha Kuasa dan ia dihasilkan sekitar tahun 1998 hingga 2015.

Menurut Nelson, buku puisi itu diterbitkan oleh Mata Aksara di Jakarta, Indonesia iaitu sebuah syarikat penerbitan diketuai oleh seorang novelis dan penyair muda Indonesia yang sangat aktif dalam kesusasteraan Indonesia.

"Penerbitan ini dilakukan di Indonesia untuk kita mengeratkan lagi hubungan kekeluargaan Se-Nusantara.

"Buku-buku kumpulan



**NELSON**

puisi ini juga saya dedikasikan kepada puteri (anak) saya, Ratuka Nelson, keluarga dan teman-teman," katanya.

Bagi latar belakang pendidikan, Nelson memegang Ijazah Sarjana Muda Sains Perhutanan dan kini sedang melanjutkan pengajian di peringkat Sarjana Sastera Seni Visual di Universiti Malaysia Sabah (UMS), Kota Kinabalu.

Pencapaian peribadinya setakat ini termasuk pernah mendapat anugerah 'Excellence in Poetry and Music Award' daripada International Training Office, Northern Illinois University, Amerika Syarikat dan 'The 100 Best Work' di 2nd ASEAN Poetry Writing Competition, Purwokerto, Indonesia.

Novel terbaharu beliau bertajuk 'Sapi Mandangan' dan 'Apuk Dagan' serta dua Kumpulan Puisi Pengikat Kasih dan Bisikan Bumi itu.

Nelson sebelum ini aktif menghantar karya dan antologi puisi ke akhbar-akhbar tempatan di negeri ini dan ia juga menjadi salah satu koleksi puisi serta karya yang dihasilkannya.



**BUKU** kumpulan puisi karya oleh Nelson Dino.